



## KOMUNIKADO PA PRENSA

*Fecha*

21 di sèptèmber 2018

*Persona di kontakto*

Jhanirha Da Costa Gomez

*Email*

[jhanirha.ania@gobiernu.cw](mailto:jhanirha.ania@gobiernu.cw)

### **Akuerdo di aviashon entre Kòrsou i Alemanía**

Willemstad – Kòrsou ta un hoyá den laman Karibe i ta pues un país dushi pa turistanan bishita. E sektor turístiko ta duna aporte importante na nos komunidad. Den e kuadro aki, Outoridat di Aviashon Sivil di Kòrsou (CCAA) ta anunsiá ku dia 20 di sèptèmber 2018 a firma un akuerdo preliminar di aviashon nobo entre Kòrsou i Alemanía. Un delegashon di Kòrsou huntu ku un delegashon di Repúblika di Alemanía a yega na palabrashonnan konkreto pa loke ta e relashon entre e paisnan aki. Sr. Hans de Jong, Direktor General di CCAA a guia e delegashon di Kòrsou i Sra. Sylvia Bielefeld, Hefe di Aviashon Internashonal di Ministerio di Transporte i Infrastruktura Digital di Alemanía a guia e delegashon di Alemanía.

E delegashonnan a yega na un akuerdo nobo riba e tereno di aviashon entre e islanan ku ta remplasá e akuerdo anterior di 1956 entre Reino Hulandes i Repúblika di Alemanía, spesífikamente pa Kòrsou. A palabra tambe ku lo tin un máksimo di 10 buelo entre e islanan. Tantu e aerolinia Condor komo Eurowings ta sumamente interesá pa ehekutá buelo regular i lo bula entre Kòrsou i Alemanía. A palabra tambe ku for di Kòrsou lo por bula pa 3 suidat di Alemanía. Esaki ta trese posibilidat pa kompanianan di Kòrsou bula e rutanen aki. Alabes a palabra tokante akuerdo pa 'Codeshare', ku ta hasi koperashon entre aerolinianan pa kompartí buelonan posibel.

E akuerdo preliminar ku a keda firma dia 20 di sèptèmber 2018 ta keda introdusí inmediatamente miéntras ku ta kana e kaminda pa formalisá e akuerdo. Esaki lo ta un empuhe grandi pa kresementu di e sektor di turismo for di Kòrsou pa e merkado europeo. Condor lo kuminsá su buelonan den novèmber i Eurowings ta antisipá di kuminsá den yüni 2019 ku buelonan regular entre Kòrsou i Alemanía.